

Na osnovu čl. 22. i 24. stav (1) Zakona o Vladi Kantona Sarajevo ("Službene novine Kantona Sarajevo", broj 24/03-Prečišćeni tekst), člana 8. stav (3) Zakona o obrtu i srodnim djelatnostima ("Službene novine Federacije BiH", broj 35/09) i člana 2. Uredbe o zaštiti tradicionalnih i starih zanata ("Službene novine Federacije BiH", broj 66/09), Vlada Kantona Sarajevo na 57. sjednici, održanoj 24. juna 2010. godine, donijela je

U R E D B U

o kriterijima i postupku za ostvarivanje prava na podsticajna sredstva za očuvanje i razvoj tradicionalnih i starih zanata – obrta

POGLAVLJE I. OPĆE ODREDBE

Član 1.

(Uslovi za ostvarivanje prava na podsticaje)

Ovom uredbom se utvrđuju uslovi (kriteriji i postupak) za ostvarivanje novčanih podsticaja zanatlijama koji obavljaju djelatnosti tradicionalnih i starih zanata - obrta na području Kantona Sarajevo, iz sredstava Budžeta Kantona Sarajevo.

POGLAVLJE II. KORISNICI

Član 2.

(Kriteriji za podsticaje)

Kriteriji za ostvarivanje prava obrtnika – zanatlija na novčane podsticaje su:

- da izrađuju proizvode starih i tradicionalnih zanata pretežnim udjelom ručnog rada, u manjim serijama, stvarajući finalni proizvod;
- da pružaju usluge starih i tradicionalnih zanata, pretežnim udjelom ručnog rada;
- da zanatsku djelatnost – obrt, obavljaju kao osnovno zanimanje;
- da imaju stručnu osposobljenost za obavljanje obrta ili da taj obrt obavljaju najmanje pet godina;
- da je sjedište obrta i prebivalište obrtnika u Kantonu Sarajevo i
- da obavljaju stare i tradicionalne zanate – obrte, obuhvaćene sljedećim popisom:
 - saračka,
 - abadžijska,
 - užarsko-metlarska,
 - četkarska,
 - sedlarsko-remenarska
 - berbersko- brijaka,
 - limarska,
 - papudžijska,
 - kazandžijska,
 - kujundžijska,
 - ćilimarska,
 - tašnarska,
 - obučarska,
 - sahaćijska,
 - kaligrafska,
 - knjigovezačka,

- graverska,
- tokarska,
- lončarska,
- kovačka,
- oštračka,
- nožarska,
- dimnjačarska,
- korparsko-pletarska,
- jorgandžijska,
- krznarska,
- veziljska,
- izrada i presvlačenje dugmadi,
- izrada rukavica, kapa i šešira,
- izrada duboreza u drvetu,
- izrada ukrasnih predmeta od drveta,
- izrada i popravak ručnih mlinova,
- izrada filigrana, nakita i predmeta od plemenitih metala,
- popravak vaga,
- bojenje odjeće,
- popravka kišobrana,
- kazaz,
- terzija,
- restaurator prepisa i rukopisa,
- limar-krovopokrivač kupola,
- tesar-ručna obrada drveta,
- kamenoklesar-ručne izrade,
- zidar sa tulek krečom,
- tkanje narodnog platna,
- krojačka,
- izrada nanula i klompi,
- izrada-gradnja muzičkih narodnih instrumenata,
- gajtandžijska,
- umjetnička izrada predmeta od gvožđa, bakra i drugih metala,
- kalaisanje-emajliranje i cinkovanje posuđa,
- puškarska,
- izrada svijeća,
- tapetarsko-dekoraterska,
- fijakerista,
- izrada vitraža,
- optičarska obrada stakla i pružanje usluga,
- izrada ukrasnih predmeta od stakla, keramike i oniksa,
- staklorezačka,
- vodeničarska.

POGLAVLJE III. NAMJENA KORIŠTENJA SREDSTAVA

Član 3.

(Namjena korištenja sredstava)

Finansijska sredstva, odobrena u skladu sa ovom Uredbom, mogu se koristiti za:

- a) poboljšanje uslova rada obrtničke radionice,
- b) troškove vezane za obavljanje učeničke prakse,
- c) troškove novoupisanih radnika,
- d) komunalne naknade javnim preduzećima i fondovima,

- e) zakupnine za korištenje poslovnog prostora,
- f) nabavku repromaterijala i slično.

POGLAVLJE IV. POSTUPAK ZA OSTVARIVANJE PRAVA

Član 4.

(Postupak za ostvarivanje prava)

(1) Ministarstvo privrede Kantona Sarajevo (u daljem tekstu: Ministarstvo privrede) će objaviti Javni poziv u sredstvima javnog informisanja, za dodjelu podsticajnih sredstava za očuvanje i razvoj tradicionalnih i starih zanata-obrta.

(2) Uz zahtjev za dodjelu sredstava, obavezno se prilaže sljedeća dokumentacija (original ili ovjerena fotokopija, ne starija od šest mjeseci):

- a) rješenje o osnivanju obrta, kao osnovno zanimanje, s upisanom djelatnošću i nazivom zanimanja,
- b) dokaz o stručnoj osposobljenosti za obavljanje obrta, vlasnika ili uposlenika,
- c) uvjerenje od nadležnog općinskog organa da se obrt obavlja kao osnovno zanimanje i da nije utvrđen trajni prestanak obavljanja registrovane djelatnosti,
- d) CIPS prijava prebivališta,
- e) ugovor o zakupu ili dokument o vlasništvu prostora,
- f) uvjerenje o poreznoj registraciji, sa ID brojem,
- g) obavještenje Službe za statistiku o razvrstavanju obrta prema djelatnosti,
- h) ugovor o otvorenom računu kod banke, koji se vodi na radnju obrtnika,
- i) svojeručno potpisanu izjavu, kojom potvrđuje da konkretnu zanatsku djelatnost obavlja najvećim dijelom ručno i da na taj način stvara finalni proizvod, odnosno pruža uslugu.

(3) Rok za podnošenje zahtjeva je 30 (trideset) dana, od dana objavljivanja u sredstvima javnog informisanja.

Član 5.

(Formiranje i rad komisije)

(1) Komisija, koju će formirati Ministarstvo privrede, će obraditi prispjele zahtjeve i po potrebi, na licu mjesta izvršiti provjeru podataka navedenih u zahtjevu, te o tome sačiniti pismeni izvještaj i utvrditi prijedlog raspodjele sredstava.

(2) Na osnovu prijedloga Komisije, Ministarstvo privrede će objaviti listu obrtnika-zanatlija koji ispunjavaju uslove za dobijanje sredstava, na oglasnoj ploči Kantona Sarajevo.

(3) Na listu iz stava 2. ovog člana može se izjaviti prigovor Ministarstvu privrede, u roku od 15 dana od dana objavljivanja liste.

(4) Po okončanju postupka iz stava 3. ovog člana, na osnovu raspoloživih sredstava, Ministar privrede će odlukom izvršiti raspodjelu sredstava, a odobrena sredstva će se uplatiti na žiro- račun obrtnika.

POGLAVLJE V. ZAVRŠNE ODREDBE

Član 6.

(Obrada zahtjeva)

Zahtjevi zaprimljeni nakon roka utvrđenog ovom uredbom neće se obrađivati.

Član 7.
(Nadzor)

Nadzor nad provođenjem ove uredbe vrši Ministarstvo privrede.

Član 8.
(Nadležnost)

Za realizaciju ove uredbe zadužuje se Ministarstvo privrede.

Član 9.
(Prestanak važeće Uredbe)

Stupanjem na snagu ove uredbe prestaje da važi Uredba o kriterijima i postupku za ostvarivanje prava na podsticajna sredstva za očuvanje i razvoj tradicionalnih i starih zanata – obrta (“Službene novine Kantona Sarajevo”, br. 20/06,4/07, 17/07 i 7/08).

Član 10.
(Stupanje na snagu)

Ova uredba stupa na snagu osmog dana, od dana objavljivanja u “Službenim novinama Kantona Sarajevo”.

Broj 02-05-17172-20/10
24.juna 2010. godine
Sarajevo

P r e m i j e r
Besim Mehmedić s.r.